

Pigisanik aalaakkaasunik piginnaatitaaffimmik pisisarnej imaluunniit atuisinnaatitaaneq pillugu Inatsisartut inatsisissaattut siunnersuut
(Ineqarnermut, Attaveqaasersuutitut Isorliunerusunullu Naalakkersuisoq)

Saqqummiussissut

(Ineqarnermut, Attaveqaasersuutitut Isorliunerusunullu Naalakkersuisoq)

Siullermeerneqarnera

Matumuuna Naalakkersuisut sinnerlugit pigisanik aalaakkaasunik piginnaatitaaffimmik pisisarnej imaluunniit atuisinnaatitaaneq pillugu Inatsisartut inatsisissaattut siunnersuut saqqummiuppara.

Siunnersuut nunarsuarmi maanna politikkikkut pissutsit, Kalaallit Nunaata soqutigineqarnerata eqqumaffigineqarneratalu annertusinerannik kinguneqartut tunngavigalugit saqqummiunneqarpoq. Nunarsuarmi nunatta eqqumaffigineqarnerulernerani nunanit allamiut nunatsinni pigisanik aalaakkaasunik piginnaatitaaffinnik pissarsisinnaanermut atuisinnaatitaanermulluunniit soqutigininnerat annertusisinnaavoq.

Nunanit allaniit pigisanik aalaakkaasunik, nunatsinnit aningaasalersuiffiisa naliginnaasut avataasigut aningaasalersorneqartunut piginnaatitaaffinnik pisisarnej atuisinnaatitaanerlu, pigisanik aalaakkaasunik niueruteqarnermi oqimaaqatigiiffiusunik pioreersunik nikisitsinissamut, aammalu akinik pilersitsinernik neqerooruteqartitsinernillu, inuit pigisanut aalaakkaasunut piginnaatitaaffinnik atuisinnaatitaanernilluunniit pissarsisinnaanerinut periarfissarititaasut annikillisinnaanerannik aarlerinartoqarneranik imaqarput.

Tamatuma peqatigisaanik nunanut allanut politikkikkut eqqarsaatigisassat peqqutaallutik, nunanit allanit nunatsinni pigisanik aalaakkaasunik piginnaatitaaffinnik pissarsinissamut atuisinnaatitaanissamullu soqutiginnittut itigartinneqarnissaat pisariaqarsinnaavoq.

Tassalu inatsisissatut siunnersuummi nunatsinni pigisanik aalaakkaasunik piginnaatitaaffimmik pissarsinissamik atuisinnaatitaanermillu niueruteqarnerup ersarissuunissaa nakkutigineqarsinnaanissaalu siunertarineqarpoq, taamaalilluni innuttaasut pigisanik aalaakkaasunik piginnaatitaaffimmik pissarsinissamut atuisinnaatitaanermullu periarfissat annikillisinneqassanngimmata, aammalu nunani allani politikkikkut pissutsit eqqarsaatigineqarnissaat qulakkeerneqassalluni.

Siunnersuummi qulequttat uku erseqqissaaffigerusuppakka:

- Inuit danskisut innuttaassusillit aamma aningaasaliisarfiit 100%-inik pigineqartut killilersorneqaratik Kalaallit Nunaanni pigisanut aalaakkaasunut piginnaatitaaffimmik pissarsisinnaapput atuisinnaatitaalersinnaallutilluunniit, imaluunniit Kalaallit Nunaanni nunaminertamik atuisinnaatitaalersinnaapput
- Inunnut danskisut innuttaassuseqanngitsunut inuup Kalaallit Nunaanni aalajangersimasumik najugaqarnissaa inuillu allattorsimaffianni najugaqartutut nalunaarsorneqarsimanissaa, kiisalu Kalaallit Nunaannut tamakkiisumik akileraartartuunissaa, tamatumalu ukiut siuliini marlunni sinnerlugilluunniit ingerlasimanissaa piunasaqaatigineqassaaq. Piunasaqaatilli taakku inissiamik nammineerluni pisinermi pigisamut aalaakkaasumut atuisinnaatitaanissamut, imaluunniit atuisinnaatitaagallarnissamut atuutissanngillat.
- Inuit suliffeqarfiilluunniit, aalisarnermut, saffiugassanik suliaqarnermut, najukkani saffiugassanik suliaqarnermut, saffiugassanik aatsitassarsiornermut takornariaqarnermullu, sermimik imermillu suliaqarnermut inatsisit atuuttut naapertorlugit Naalakkersuisunit akuersissutit tunngavigalugit suliaqartut aalajangersakkanut ilaatinneqanngillat, aammalu pigisanik aalaakkaasunik, suliaqarnermi atugassanik piginnaatitaaffimmik pisinnaapput aamma atuisinnaatitaapput.
- Inuit imaluunniit suliffeqarfiit aalajangersakkanik matuma siuliani allassimasunik naammassinnissimanngitsut taamaallaat siumoortumik Naalakkersuisunit allakkatigut akuersissummik pissarsinermikkut pigisanut aalaakkaasunut piginnaatitaaffimmik pissarsisinnaapput atuisinnaatitaalersinnaallutilluunniit tunineqarsinnaapput.

Taamatut oqaaseqarlunga Naalakkersuisut sinnerlugit immikkoortoq Inatsisartunut suliassanngorlugu tunniukkusuppara.